

珠官脞錄卷一

許瑞棠輯著



珠官

合浦縣漢武元鼎六年平越所置也王莽更名曰桓合縣曰桓亭孫權黃武七年改珠官縣水經注

廉山

廉州卽合浦七郡之一以其地有大廉山改名廉州元和志大廉山在縣東北一百里府志作縣東一百三十里高百餘丈爲廉之鎮山廣東與圖形勢秀拔盤礴數十里與博白縣蟠鱗山相連大廉洞在其陽陸湖洞在其陰縣志又云東漢費貽爲合浦太守有廉聲去日百姓追送至此遂以名山大清一統志吳東湖詩云行李

紛紛宦遊子幾人不愧大廉山

三口浪

廉州海中常有浪三口連珠而起聲若雷轟名三口浪相傳舊有九口馬伏波射滅其六予有伏波射潮歌云后羿射日落其九伏波射潮滅六口海水至今不敢驕三口連珠若雷

吼廣東新語

大觀港

合浦大洗港卽今大觀港有潮西道名九河江中有赤羊塹蛋人取蠔於此又名出蠔塹父老相傳馬伏波征交趾時合浦外海運糧至軍恒苦大觀港西二澳沙高水淺必候潮長方能行舟時有賊船堵截港口糧船不得出遂昏夜鑿九河

峰腰之地直達烏雷以通糧船乃束羊於鼓繫鈴於鳥置之
墜上以疑奪運者其掘鑿處約長七八里闊五六丈深三四
丈兩頭潮水相通但中多海欖木叢生焉

羅城江

羅城江源自大江分派其江北岸高南岸下明宏治初知府
劉烜見其土沃廣可田乃累石壩於江中橫截水道灌墾為
田招民耕種興忠里之民至今利之廣東考
古輯要

白沙江

白沙江在縣東北源出那東江而流入石康大江明嘉靖十
五年知府張岳令民築壩十五丈截流灌田數百畝同上

思鄉水

思鄉水源出廉州之廢石康縣思峒山至五利江復還本縣
界內入晏江以其去而復還故名思鄉水予有謠曰水亦思
鄉向故山人流不似水流還人流若似思鄉水那有離愁在

世間廣東
新語

廉江

廉江在合浦縣北明饒秉鑑詩長江來浩浩何事得廉名自
是源長潔因之流亦清浪浮雲影動波靜月華明寄語滄浪
客於茲好濯纓一名宴江廣東考
古輯要

象郡

廉地屬象郡昔多產象明正德間合浦大廉山猶有羣象踐
禾稼知府胡鰲率兵民捕之今則象類日稀少見之矣同上

草花嶺

草花嶺去縣城二十里圓峰三五疊起多產奇花不可移植
府志惟杜鵑花最盛春際紅雨滿山而杜鵑亦多鳴其處

白石山

白石山在城東北六十里山石皆白大清一統志東波云青山南
白石北此地崔峨人不識卽此也廣東輿圖舊石康縣有白石鎮

在山下九城志

九頭嶺

九頭嶺在縣南十里脉自青山繞城東折而西繞廉江邱阜
纍纍以千百計江行數之其頭有九故名大清一統志

冠頭嶺

冠頭嶺在縣南八十里西南臨江東北去乾體營四十里脉
自大廉山草花牛尾漸伏而西躍出海邊亘三十里形勢穹
窿山石皆黑如冠南北皆澳海船義焉大清一統志臨海岸若外
郭廣東輿圖潮長撼石如雷相傳交址黎王塋此交址人每年望
海祭之府志

按脉自老虎嶺至牛尾嶺與草花隔江一統志或失攷

五黃山

五黃山在縣西北一百七十里高五百餘丈綿亘數十里
廣東輿圖相傳昔有樵者迷路遇五人黃冠朱顏指示得歸因名
大清一統志俗呼爲五皇嶺上有五皇廟白鶴觀廣東輿圖

冠蓋山

冠蓋山在城東八里形如沙帽

金雞水

金雞水在縣東昔有金雞浴於水旁故名廣東考古輯要

雁湖

雁湖在縣西北每秋冬有雙雁游其間因名輿地紀勝

夫人山

夫人山在縣東一名寶山又名殯山寰宇記云廉州有殯山即宋陳伯紹殯妻處同上

糠頭山

糠頭山在縣西北一百二十里尉佗駐軍處居人舂穀積糠成山山若鳴則風颭立至見寰宇記一名狼頭又名軍頭山

廣東輿圖

大石屯

大石屯舊有大石常浮水面傳聞有產婦踞其上石不復見

鹿井砦

鹿井砦在縣西南寰宇記太平軍西南至鹿井與欽州烏土鎮接界九域志合浦縣有鹿井二砦同上

珠市

珠市為東粵四市之一在廉城西賣魚街橋畔盛平時蚌殼堆積有如玉阜土人多以珠肉餉客雜薑蠶食之味甚甘美其細珠若梁粟者亦多實於腹中矣語曰生長海隅食珠衣

珠廣東新語

王龍巖

王龍巖在北海冠頭嶺下深數丈僧人就巖為寺顏為廉陽古洞寺前數石屹立波心海浪相擊如鳴鼓鐘有清泉從巖面下滴僧接之烹茗飲客甚湛冽

銅船湖

南北湖在縣東北登高山之陽今湮大清一統志湖去縣四十里

志相傳馬援鑄銅船五以其四往征林邑留一於此方輿紀要天

陰雨浮出湖面樵捕者常得見之因名湖曰銅船湖鄺露詩銅船亘奔流又云冒險觸銅船是也又有一牛在湖中以雞酒為祭便大獲魚若此醴不設惟得牛糞而已廣東新語

石巖泉

濶洲有古廟祀三婆在石巖上岩高數十丈天外峭壁有泉一點正落廟庭滴瀝不已

古阜民墟

古阜民墟在金蕭門舊為形場今某舖尚有古墓一昔吳三桂使李成棟陷合浦時知縣金世爵不屈相傳死於此

雙月池

雙月池在萬靈寺側每當月夜望池中有雙月相映池後淤塞邑人再於其地鑿之名雙月并不復見雙月舊志

珠池

合浦海中有珠池七所其大者曰平江楊梅青嬰次曰烏坭白沙斷望海猪沙而白龍池尤大其底皆與海通海水鹹而

珠池淡淡乃生珠蓋月之精華所注焉故珠生池中央者色白生池邊者色黃以海水震蕩鹹氣侵之故黃也珠者蚌類也蚌之陰精圓澤爲珠故郭璞曰瓊蚌晞曜以瑩珠或以爲石決明產非也珠一名神胎凡珠有胎蓋蚌聞雷則瘵瘦其孕珠如孕子然故曰珠胎蚌之病也珠胎故與月盈昃望月而胎中秋蚌始胎珠中秋無月則蚌無胎呂氏春秋云月羣陰之本月望則蚌蛤實羣陰盈月晦則蚌蛤虛羣陰揜淮南子云蛤蟹珠龜與月盛衰又云月以而贏蚌焦語曰溷蚌之精孕爲明月又曰蚌胎之珠隨月圓缺予詩云中秋月滿珠同滿吐納清光一一開明月本爲珠作命明珠元以月爲胎是也

六

凡秋夕海色空明而天半閃爍如赤霞此老蚌曬珠之候蚌故自愛其珠得月光多者其珠白曬之所以爲潤澤也凡蚌無陰陽牝牡須雀雉變化而成故能生珠專一於陰也曰珠牡者言其蚌大無陰也或以九孔贏爲珠牡非也曰珠母者言其無陽也蚌以月爲食與蟾蜍相爲性命呼吸太陰之精無大小皆有珠皆牝類也稱海曰珠母宜也又珠母者大珠在中小珠還之也予詩云珠池千里水茫茫蚌蛤秋來食月光取水月中珠有孕精華一片與天長是也凡採生珠以二月之望爲始珠戶人招集贏夫割五大牲以禱稍不虔潔則大風翻攪海水或有大魚在蚌蛤左右珠不可得又復望祭于白龍池以斯池接近交趾其水深不可得

珠冀珠神移其文珠至于邊海也予詩云暮春爭賽白龍池
桂席乘潮採不遲千尺贏筐垂海底翻波不使巨魚知是也
採之之法以黃藤絲棕及人髮紐合爲纜大徑三四寸以鐵
爲樞以二鐵輪絞之纜之收放以數十人司之每船樞二纜
二輪二帆五六其纜繫船兩旁以垂筐筐中置珠媒引珠乘
風帆張筐重則船不動乃落帆收樞而上剖蚌出珠蚌有一
珠者數珠者有絕無珠者有僅得珊瑚碎枝及五色文石金
銀者蓋有數焉珠身以圓白光瑩細無絲絡者爲精珠半明
半暗者爲砗光珠次肉珠次縹珠藥珠大而稍匾者曰瑤珠
所謂南海之明瑞也其曰走珠滑珠礪珠官兩珠稅珠蘆
珠符珠稗珠古有此名今莫能盡辨但以精珠龍睛粉白重

一分者銀六倒二分者四十倒肉珠二分重者四倒合八百
顆而成一兩者曰八百子則十倒合千顆而成一兩者曰正
千八倒其重七分者爲珍八分者爲寶故曰七珍八寶其價
則莫可定云

凡珠歲有豐耗多得者謂之珠熟少曰珠荒然古時珠賤今
珠貴古時合浦人以珠易米珠多而人不重今天下人無貴
賤皆尚珠數萬金珠至五芋之市一夕而售奸人或以珠池
爲逋逃藪與官吏交通盜珠之人一而買珠之人千百產珠
之池一隅而用珠之國極於東南朝富者以多珠爲榮貧者
以無珠爲恥至有金子不如珠子之語此風俗之所以日偷
也聖明在上不寶珠玉以撲儉身先是所望於今日矣

往總制林富有疏請罷採珠謂珠一採之後數年始生又數年始長又數年而始老故禁私採禁數採所以生長之今經數採即以人命易珠有不能多得者言甚愷切珠本神物善從太守廉則珠復還予嘗至合浦止于城西賣魚橋故珠市也聞珠母肉作秋海棠或杏華色甚甘鮮而性太寒草木記云採珠人以珠柱作詐今不可得土人餉我珠肉臘以爲珍持以下酒謂珠比年皆他徙又縣之後海龍岐青羸角荔枝莊一十三處亦產珠母羸及珠羸樹今皆無之元時張惟寅上狀言珠蚌生在數拾丈水中取之必以繩引而縋人而下氣欲絕則掣動其繩舟中人疾引而出稍遲則七竅流血而死或爲惡魚所噬蚌逾百十得珠僅能一二乞申罷之其言

與林富相表裏留心民命者可不知之

產合浦之地者多稱珠人予嘗有珠人曲云一唇有數珠大小相連綴採珠乘月圓揚帆入龍穴又云珠母秋孕精華得月全明珠無大小都在口唇邊又云水淡珠多白水鹹珠多黃月光化爲水來養明月瑞又云生長珠池房食珠如食米日夕剖神胎珠肉薦芳醴又云兒女抱珠筐細珠棄不取珠母肉微紅色似海棠乳蓋蚌蛤食月之光以成珠者月之光所凝故色白其肉亦白而有微紅則月中之一陽也白又以水之淡其水取之於月中故淡也水者月光之所化雖在鹹海之中而精華不混蚌蛤實月之光於復而成珠於唇珠在唇故嘗吐之以自媚也大抵蚌蛤以月爲命月者水之精

珠則月之精其生不易故得之亦不易

合浦珠名曰南珠其出西洋者曰西珠出東洋者曰東珠東

珠豆青白色其光潤不如西珠西珠又不如南珠南珠自雷

廉至交趾千里間六池出斷望者上次竹林次楊梅次平山

至汗泥為下然皆美於洋珠必山云洋大如豆者竟似夜光

但易碎又輕一名玻璃珠其中空故輕凡珠有生珠有養珠

生珠者以蚌曬之日中其口自開則珠光瑩謂之生珠若剖

蚌出珠則黠黠矣是謂死珠養珠者以大蚌浸水盆中而以

蚌質車作圓珠俟大蚌口開而投之頻易清水乘夜置月中

大蚌采玩月華數月即成真珠是謂養珠養成與生珠如一

蚌不知其出於人也蚌之精神蓋月之精神也廣東新語

九

珠母海去石康八十里即合浦也凡珠瑞出於蚌蚌母廣數

寸長尺餘寰宇記珠母者蚌也採珠必蛋丁鐵圍山叢談蛋人沒而

得蚌割珠蛋人自云海中珠池若城郭然其中光怪不可嚮

邇常有怪物護持嶺外代答取珠人泊舟海港數十聯絡天氣晴

即同開至池以鐵物墜網海底以鐵撥撥蚌滿網舉而入舟

舟滿登岸取而剖之皆凡珠也偶或一舟得寶珠即有片雲

如墨風陡作必舉而棄之始免覆溺然群舟之中不知何舟

得寶必咸棄之數十舟皆空手而回否則片板無存矣其蚌

圓而底平與肉蚌不同嶺南雜記黃呈蘭珠池詩珠池萬頃渾鴻

濛珠池池在南海中珠池底與鹹潮通池有明珠水清溶混

之不濁何洵洵暮春珠人賽白龍白龍池在交趾東珠神之

貴等祝融珠船大小乘長風攜筐白叟與黃童執樯入海浪
重重隨波逐浪駕飛篷採珠焉敢惜微躬珠色黃白肉微紅
得之可以獻王公水光光漾月玲瓏蚌吸月華向晴空孕爲
明珠藏蛟宮老蚌寶珠與龍同珠人昔富今何窮太守賢良
珠年豐深信明珠不易逢

龍村

相傳合浦進城鄉第二圖之龍村人有得夜光珠者不知其
爲寶也以之易粟其人納之口中量粟畢不覺誤吞之腹遂
脹滿不能食數數入水未幾遍體龍鱗隱起一夕化爲龍所
居室悉淪爲深淵故今謂之龍村云

銀錠井

城北四十五里石康馬欄墟前有銀錠井地生古木一截中
窪約深尺許闊如斗四圍擁石泉從木竅出清冽異常冬夏
不竭